

四庫全書

史部

欽定四庫全書

通鑑總類卷九上

宋 沈樞 撰

諫諍門

魏任座之言直

周威烈王二十三年魏文侯使樂羊伐中山克之以封其子擊文侯問於羣臣曰我何如主皆曰仁君任座曰君得中山不以封君之弟而以封君之子何謂仁君文侯怒任座趨出次問翟璜對曰仁君也文侯曰何以知

之對曰臣聞君仁則臣直嚮者任座之言直臣以是知之文侯悅使翟璜召任座而反之親下堂迎之以為上客

秦趙良諫商君之治秦

顯王三十一年初商君相秦用法嚴酷嘗臨渭論囚渭水盡赤為相十年人多怨之趙良見商君商君問曰子觀我治秦孰與五羖大夫賢趙良曰千人之諾諾不如一士之諤諤僕請終日正言而無誅可乎商君曰諾趙

良曰五殺大夫荊之鄙人也穆公舉之牛口之下而加之百姓之上秦國莫敢望焉相秦六七年而東伐鄭三置晉君一救荊禍其為相也勞不坐乘暑不張蓋行于國中不從車乘不操干戈五殺大夫死秦國男女流涕童子不歌謠舂者不相杵今君之見也因嬖人景監以為主其從政也凌轢公族殘傷百姓公子虔杜門不出已八年矣君又殺祝懽而黜公孫賈詩曰得人者興失人者崩此數者非所以得人也君之出也後車載甲多

力而駢脅者為駮乘持矛而操闔戟者旁車而趨此一物不具君固不出書曰恃德者昌恃力者亡此數者非恃德也君之危若朝露而尚貪商於之富寵秦國之政畜百姓之怨秦王一旦捐賓客而不立朝秦國之所以收君者豈其微哉商君弗從居五月而難作

漢樊噲說沛公還軍霸上

高帝元年沛公西入咸陽諸將皆爭走金帛財物之府分之蕭何獨先入收秦丞相府圖籍藏之以此沛公得

具知天下阨塞戶口多少彊弱之處沛公見秦宮室帷
帳狗馬重寶婦女以千數意欲留居之樊噲諫曰沛公
欲有天下耶將為富家翁耶凡此奢麗之物皆秦所以
亡也沛公何用焉願急還霸上無留宮中沛公不聽張
良曰秦為無道故沛公得至此夫為天下除殘賊宜編
素為資今始入秦即安其樂此所謂助桀為虐且忠言
逆耳利於行毒藥苦口利於病願沛公聽樊噲言沛公
乃還軍霸上

張良諫漢王立六國之後

三年楚數侵奪漢甬道漢軍乏食漢王與酈食其謀撓楚權食其曰昔湯伐桀封其後於杞武王伐紂封其後於宋今秦失德棄義侵伐諸侯滅其社稷使無立錐之地陛下誠能復立六國之後楚必斂衽而朝漢王曰善趣刻印先生因行佩之矣張良從外來謁漢王方食曰客有為我計撓楚權者具以酈生語告良良曰畫此計者陛下事去矣漢王曰何哉對曰臣請借前箸為大王

籌之昔湯武封桀紂之後者度能制其死生之命也今
陛下能制項籍之死命乎其不可一也武王入殷表商
容之閭釋箕子之囚封比干之墓今陛下能乎其不可
二也發巨橋之粟散鹿臺之錢以賜貧窮今陛下能乎
其不可三也殷事已畢偃革為軒倒載干戈示天下不
復用兵今陛下能乎其不可四也休馬華山之陽示以
無為今陛下能乎其不可五也放牛桃林之陰以示不
復輸積今陛下能乎其不可六也天下游士離其親戚

棄墳墓去故舊從陛下游者徒欲日夜望咫尺之地今
復立六國之後天下游士各歸事其主從其親戚反其
故舊墳墓陛下與誰取天下乎其不可七也且夫楚唯
無彊六國立者復撓而從之陛下焉得而臣之其不可
八也誠用客之謀陛下事去矣漢王輟食吐哺罵曰豎
儒幾敗而公事令趣銷印

賈山言治亂之道

文帝二年賈山上書言治亂之道曰臣聞雷霆之所擊

無不摧折者萬鈞之所壓無不靡滅者今人主之威非特雷霆也執重非特萬鈞也開道而求諫和顏色而受之用其言而顯其身士猶恐懼而不敢自盡又況於縱欲恣暴惡聞其過乎震之以威壓之以重雖有堯舜之智孟賁之勇豈有不摧折者哉如此則人主不得聞其過社稷危矣

文帝止輦受言

文帝每朝郎從官上書疏未嘗不止輦受其言言不可

用置之言可用采之未嘗不稱善文帝從霸陵上欲西馳下峻阪中郎將袁盎騎並車攀轡曰臣聞千金之子坐不垂堂聖主不乘危不徼幸今陛下騁六飛馳下峻山有如馬驚車敗陛下縱自輕奈高廟太后何文帝乃止文帝所幸慎夫人在禁中常與皇后同席坐及坐袁盎引卻慎夫人坐慎夫人怒文帝亦怒盎因前說曰臣聞尊卑有序則上下和今陛下既已立后慎夫人乃妾妾主豈可與同坐哉陛下獨不見人羗乎於是文帝乃

說名語慎夫人慎夫人賜盎金五十斤

文帝詔除誹謗詆言之罪

詔曰古之治天下朝有進善之旌誹謗之木所以通治道而來諫者也今法有誹謗詆言之罪是使衆臣不敢盡情而上無由聞過失也將何以來遠方之賢良其除之

魏相乞賞韓義子以旌諫臣

元鳳元年文學魏相對策以為日者燕王為無道韓義

出身彊諫為王所殺義無比干之親而蹈比干之節宜
顯賞其子以示天下明為人臣之義乃擢義子延壽為
諫大夫

宣帝出諫官以補郡吏

元康元年宣帝選博士諫大夫通政事者補郡國守相
以蕭望之為平原太守望之上疏曰陛下哀愍百姓恐
德之不究悉出諫官以補郡吏朝無爭臣則不知過所
謂憂其末而忘其本者也宣帝乃徵望之入守少府

貢禹勸元帝節儉

初元元年元帝素聞琅邪王吉貢禹皆明經潔行遣使者徵之吉道病卒禹至拜為諫大夫元帝數虛已問以政事禹奏言古者人君節儉什一而稅亡它賦役故家給人足高祖孝文孝景皇帝宮女不過十餘人廐馬百餘匹後世爭為奢侈轉轉益甚臣下亦相放效臣愚以為如太古難宜少放古以自節焉方今宮室已定無可奈何矣其餘盡可減損故時齊三服官輸物不過十笥

方今齊三服官作工各數千人一歲費數鉅萬廐馬食粟將萬匹武帝時又多取好女至數千人以填後宮及棄天下多藏金錢財物鳥獸魚鼈凡百九十物又皆以後宮女置于園陵至孝宣皇帝時陛下惡有所言羣臣亦隨故事甚可痛也故使天下承化取女皆大過度諸侯妻妾或至數百人豪富吏民畜歌者至數十人是以內多怨女外多曠夫及衆庶葬埋皆虛地上以實地下其過自上生皆在大臣循故事之舉也唯陛下深察古

道從其儉者大減損乘輿服御器物三分去二擇後宮
賢者留二十人餘悉歸之及諸陵園女無子者宜悉遣
廐馬可無過數十匹獨舍長安城南苑地以為田獵之
囿以方今天下饑饉可無大自損減以救之稱天意乎
天生聖人蓋為萬民非獨使自娛樂而已也天子納善
其言下詔令諸宮館希御幸者勿繕治太僕減穀食馬
水衡省肉食獸臣光曰忠臣之事君也責其所難則
其易者不勞而正補其所短則其長者不勸而遂孝元

踐位之初虛心以問禹禹宜先其所急後其所緩然則
優游不斷讒佞用權當時之大患也而禹不以為言恭
謹節儉孝元之素志也而禹孜孜言之何哉使禹之智
不足以知烏得為賢知而不言為罪愈大矣

薛廣德諫元帝御樓船

永光元年元帝耐祭宗廟出便門欲御樓船薛廣德當
乘輿車免冠頓首曰宜從橋詔曰大夫冠廣德曰陛下
不聽臣臣自刎以血汙車輪陛下不得入廟矣元帝不

說先歐光祿大夫張猛進曰臣聞主聖臣直乘船危就
橋安聖主不乘危御史大夫言可聽元帝曰曉人不當
如是邪乃從橋

劉輔諫立趙婕妤

永始元年成帝欲立趙婕妤為皇后諫大夫劉輔上書
言昔武王周公承順天地以饗魚鳥之瑞然猶君臣祇
懼動色相戒況于季世不蒙繼嗣之福屢受威怒之異
者虜雖夙夜自責改過易行畏天命念祖業妙選有德

之世考卜窈窕之女以承宗廟順神祇心塞天下望子
孫之祥猶恐晚暮今乃觸情縱欲傾于卑賤之女欲以
毋天下不畏于天不媿于人惑莫大焉里語曰腐木不
可以為柱卑人不可以為主天人之所不予必有禍而
無福臣竊傷心不敢不盡死書奏成帝使侍御史收縛
輔繫掖庭祕獄羣臣莫知其故於是左將軍辛慶忌等
俱上書曰竊見劉輔前以縣令求見擢為諫大夫此其
言必有卓詭切至當聖心者旬月之間收下祕獄臣等

愚以為輔幸得托公族之親在諫臣之列新從下土來
未知朝廷體獨觸忌諱不足深過小罪宜隱忍而已如
有大惡宜暴治理官與衆共之今天心未豫災異屢降
水旱迭臻方當隆寬廣問褒直盡下之時也而行慘急
之誅於諫爭之臣震驚羣下失忠直心公卿以下見陞
下進用輔亟而折傷之暴人有懼心精銳銷喪莫敢盡
節正言非所以昭有虞之聽廣德美之風臣等竊深傷
之成帝乃徙繫輔共工獄減死罪一等論為鬼薪

谷永言事有內應

二年谷永為涼州刺史奏事京師訖當之部成帝使尚書問永受所欲言永對曰臣聞王天下有國家者患在上有危亡之事而危亡之言不得上聞如使危亡之言輒上聞則商周不易姓而迭興三王不變改而更用陛下誠垂寬明之聽無忌諱之誅使芻蕘之臣得盡所聞於前羣臣之上願社稷之長福也陛下棄萬乘之至貴樂家人之賤事崇聚僞僞輕無義小人以為私客數離深

宮之固挺身晨夜與羣小相隨烏集雜會醉飽吏民之家亂服共坐流湏媒嫚溷殺無別黽勉遁樂晝夜在路典門戶奉宿衛之臣執干戈而守空宮公卿百僚不知陛下所在積數年矣王者以民為基民以財為本財竭則下畔下畔則上亡是以明王愛養基本不敢窮極使民如承大祭今陛下輕奪民財不愛民力聽邪臣之計去高敞初陵改作昌陵役百乾谿費擬驪山靡敞天下五年不成而後反故百姓愁恨感天飢饉仍臻流散冗

食餒死於道以百萬數公家無一年之畜百姓無旬日之儲上下俱匱無以相救為人後嗣守人功業如此豈不負哉成帝性寬好文辭而溺于燕樂皆皇太后與諸舅夙夜所常憂至親難數言故推永等使因天變而切諫勸成帝納用之永自知有內應展意無所依違每言事輒見答禮至上此對成帝大怒

孔光所言輒削草藁

孔光領尚書典樞機十餘年守法度修故事成帝有所

問據經法以心所安而對不希指苟合如或不從不敢
彊諫諍以是久而安時有所言輒削草藁以為章主之
過以訐忠直人臣大罪也有所薦舉唯恐其人之聞知
沐日歸休兄弟妻子燕語終不及朝省政事或問光溫
室省中樹皆何木也光嘿不應更答以它語其不泄如
是

師丹以奏事漏泄獲罪

建平元年師丹使吏書奏吏私寫其草丁傅子弟聞之

使人上書告丹上封事行道人徧持其書哀帝以問將
軍中朝臣皆對曰忠臣不顯諫大臣奏事不宜漏泄宜
下廷尉治事下廷尉劾丹大不敬事未決給事中博士
申咸快欽上書言丹經行無比自近世大臣能若丹者
少發憤懣奏封事不及深思遠慮使主簿書漏泄之過
不在丹以此貶黜恐不厭衆心哀帝貶咸欽秩各二等
遂策免丹尚書令唐林上疏曰竊見免大司空丹策書
泰深痛切君子作文為賢者諱丹經為世儒宗德為國

黃耆親傳聖躬位在三公所坐者微海內未見其大過
事既以往免爵太重京師識者咸以為宜復丹爵邑使
奉朝請惟陛下裁覽哀帝從林言下詔賜丹爵關內侯

鮑宣上書論七亡七死

四年諫大夫渤海鮑宣上書曰竊見孝成皇帝時外親
持權人人牽引所私以充塞朝廷妨賢人路濁亂天下
奢泰亡度窮困百姓是以日食且十彗星四起危亡之
徵陛下所親見也今奈何反覆劇于前乎今民有七亡

陰陽不和水旱為災一亡也縣官重責更賦租稅二亡也貪吏並公受取不已三亡也豪彊大姓蠶食亡厭四亡也苛吏繇役失農桑時五亡也部落鼓鳴男女遮列六亡也盜賊劫略取民財物七亡也七亡尚可又有七死酷吏毆殺一死也治獄深刻二死也冤陷亡辜三死也盜賊橫發四死也怨讎相殘五死也歲惡飢餓六死也時氣疾疫七死也民有七亡而無一得欲望國安誠難民有七死而無一生欲望刑措誠難此非公卿守相

貪殘成化之所致邪羣臣幸得居尊官食重祿豈有肯
加惻隱于細民助陛下流教化者邪志但在營私家稱
賓客為姦利而已以苟容曲從為賢以拱默尸祿為智
謂如臣宣等為愚陛下擢臣巖穴誠冀有益毫毛豈徒
欲使臣美食大官重高門之地哉天下乃皇天之天下
也陛下上為皇天子下為黎庶父母為天牧養元元視
之當如一合尸鳩之詩今貧民菜食不厭衣又穿空父
子夫婦不能相保誠可為酸鼻陛下不救將安所歸命

乎奈何獨私養外親與幸臣董賢多賞賜以大萬數使
奴從賓客漿酒藿肉蒼頭廬兒皆用致富非天意也及
汝昌侯傳商亡功而封夫官爵非陛下之官爵乃天下
之官爵也陛下取非其官官非其人而望天說民服豈
不難哉宣語雖刻切哀帝以宣名儒優容之

申屠剛謂忠言至諫希得用

建武五年申屠剛諫隗囂曰夫未至豫言固常為虛及
其已至又無所及是以忠言至諫希得為用誠願反覆

愚老之言囂不納

鍾離意獨敢諫諍

永平三年明帝性褊察好以耳目隱發為明公卿大臣數被詆毀近臣尚書以下至見提曳嘗以事怒郎藥崧以杖撞之崧走入牀下明帝怒甚疾言曰郎出崧乃曰天子穆穆諸侯皇皇未聞人君自起撞郎明帝乃赦之是時朝廷莫不悚慄爭為嚴切以避誅責唯鍾離意獨敢諫爭數封還詔書臣下過失輒救解之會連有變異

意上疏曰陛下畏敬鬼神憂恤黎元而天氣未和寒暑
違節者咎在羣臣不能宣化治職而以苛刻為俗百官
無相親之心吏民無雍雍之志至于感逆和氣以致天
災百姓可以德勝難以力服鹿鳴之詩必言宴樂者以
人神之心洽然後天氣和也願陛下垂聖德緩刑罰順
時氣以調陰陽明帝雖不能時用然知其至誠終愛厚
之

陳蕃諫桓帝遊獵

延熹六年桓帝校獵廣成遂幸函谷關上林苑光祿勳
陳蕃上疏諫曰安平之時遊畋宜有節況今有三空之
危哉田野空朝廷空倉庫空加之兵戎未戢四方離散
是陛下焦心毀顏坐以待旦之時也豈宜揚旗曜武騁
心輿馬之觀乎又前秋多雨民始種麥今失其勸種之
時而令給驅禽除路之役非賢聖恤民之意也書奏不
納

劉瑜說桓帝開廣諫道

八年太尉楊秉薨秉為人清白寡欲嘗稱我有三不惑
酒色財也秉既沒所舉賢良廣陵劉瑜乃至京師上書
言中官不當比肩裂土競立肩嗣繼體傳爵又嬖女充
積冗食空宮傷生費國又第舍增多窮極奇巧掘山攻
石促以嚴刑州郡官府各自考事姦情賕賂皆為吏餌
民愁鬱結起入賊黨官輒興兵誅討其罪貧困之民或
有賣其首級以要酬賞父兄相代殘身妻孥相視分裂
又陛下好微行近習之家私幸宦者之舍賓客市買熏

灼道路因此暴縱無所不容惟陛下開廣諫道博觀前古遠佞邪之人放鄭衛之聲則政致和平德感祥風矣詔特召瑜問災咎之徵執政者欲令瑜依違其辭乃更策以它事瑜復悉心對八千餘言有切于前拜為議郎

魏辛毗引裾諫徙士卒

黃初元年文帝欲徙冀州士卒家十萬戶實河南時天旱蝗民飢羣司以為不可而帝意甚盛侍中辛毗與朝臣俱求見文帝知其欲諫作色以待之皆莫敢言毗曰

陛下欲徙士家其計安出文帝曰卿謂我徙之非邪毗
曰誠以為非也文帝曰吾不與卿議也毗曰陛下不以
臣不肖置之左右廁之謀議之官安得不與臣議邪臣
所言非私也乃社稷之慮也安得怒臣文帝不答起入
內毗隨而引其裾文帝遂奮衣不還良久乃出曰佐治
卿持我何太急邪毗曰今徙既失民心又無以食也故
臣不敢不力爭文帝乃徙其半文帝嘗出射雉顧羣臣
曰射雉樂哉毗對曰於陛下甚樂於羣下甚苦文帝默

然後遂為之稀出

吳張紘臨困留牋

太和三年吳張紘還吳迎家道病卒臨困授子靖留牋
曰自古有國有家者咸欲修德政以比隆盛世至于其
治多不馨香非無忠臣賢佐也由主不勝其情弗能用
耳夫人情憚難而趨易好同而惡異與治道相反傳曰
從善如登從惡如崩言善之難也人君承奕世之基據
自然之執操八柄之威甘易同之歡無假取于人而忠

臣挾難進之術吐逆耳之言其不合也不亦宜乎離則有釁巧辨緣間眩于小忠戀于恩愛賢愚雜錯黜陟失敘其所由來情亂之也故明君寤之求賢如飢渴受諫而不厭抑情損欲以義割恩則上無偏謬之授下無希冀之望矣吳主省書為之流涕

陳羣每上封事輒削其草

青龍四年潁陰靖侯陳羣卒羣前後數陳得失每上封事輒削其草時人及其子弟莫能知也論者或譏羣居

位拱默正始中詔撰羣臣上書以為名臣奏議朝士乃見羣諫事皆歎息焉

晉武帝不罪忠謹之言

泰始八年武帝與右將軍皇甫陶論事陶與武帝爭言散騎常侍鄭徽表請罪之武帝曰忠謹之言唯患不聞徽越職妄奏豈朕之意遂免徽官

漢劉殷不犯顏忤旨

永嘉六年漢大昌文獻公劉殷卒殷為相不犯顏忤旨

然因事進規補益甚多漢主聰每與羣臣議政事殷無所是非羣臣出殷獨留為聰敷暢條理商確事宜聰未嘗不從之殷常戒子孫曰事君當務幾諫凡人尚不可面斥其過况萬乘乎夫幾諫之功無異犯顏但不彰君之過所以為優耳官至侍中太保錄尚書賜劍履入殿入朝不趨乘輿入殿然殷在公卿間常恂恂有卑讓之色故能處驕暴之國保其富貴不失令名以壽考自終

陳元達諫劉聰起鷄儀殿

建興元年漢主聰立貴嬪劉娥為皇后為之起鷄儀殿
廷尉陳元達切諫以為天生民而樹之君使司牧之非
以兆民之命窮一人之欲也晉氏失德大漢受之蒼生
引領庶幾息肩是以光文皇帝身衣大布居無重茵后
妃不衣錦綺乘輿馬不食粟愛民故也陛下踐阼以來
已作殿觀四十餘所加之軍旅數興饋運不息飢饉疾
疫死亡相繼而益思營繕豈為民父母之意乎今有晉
遺類西據關中南擅江表李雄奄有巴蜀王浚劉琨窺

審肘腋石勒曹嶷貢稟漸疎陛下釋此不憂乃更為中
宮作殿豈目前之所急乎昔太宗居治安之世粟帛流
衍猶愛百金之費息露臺之役陛下承荒亂之餘所有
之地不過太宗之二郡戰守之備非特匈奴南越而已
而宮室之侈乃至于此臣所以不敢不冒死而言也聰
大怒曰朕為天子營一殿何問汝鼠子乎乃敢妄言沮
衆不殺此鼠子朕殿不成命左右曳出斬之時聰在逍
遙園李中堂元達先鎖晉而入即以鎖鎖堂下樹呼曰

臣所言者社稷之計而陛下殺臣朱雲有言臣得與龍
逢此干遊足矣左右曳之不能動大司徒任顗等叩頭
出血曰元達盡忠竭慮知無不言臣等竊祿偷安每見
之未嘗不發愧今所言雖狂直願陛下容之因諫諍而
斬列卿其如後世何聰默然劉后聞之密敕左右停刑
手疏上言今宮室已備無煩更營四海未壹宜愛民力
廷尉之言社稷之福也陛下宜加封賞而更誅之四海
謂陛下何如哉夫忠臣進諫者固不顧其身也而人主

拒諫者亦不顧其身也陛下為妾營殿而殺諫臣使忠良結舌者由妾遠近怨怒者由妾公私困弊者由妾社稷陷危者由妾天下之罪皆萃於妾妾何以當之妾誠無面目復奉巾櫛願賜死此堂以塞陛下之過聰覽之變色任顗等叩頭流涕不已聰命顗等冠履就坐引元達上以劉氏表示之曰外輔如公內輔如后朕復何憂賜顗等粟帛各有差更命逍遙園曰納賢園李中堂曰愧賢堂聰謂元達曰卿當畏朕而反使朕畏卿邪

陳元達諫劉聰立三后

建興三年漢主聰納中護軍靳準二女月光月華立月光為上皇后劉貴妃為左皇后月華為右皇后左司隸陳元達極諫以為竝立三后非禮也聰不悅以元達為右光祿大夫外示優崇實奪其權於是太尉范隆等皆請以位讓元達聰乃復以元達為御史大夫儀同三司月光有穢行元達奏之聰不得已廢之月光慙恚自殺聰恨元達

河間王易極諫劉聰

四年漢主聰出臨上秋閣命收陳休卜崇及蔡母達公
師或王琰田歆朱諧並誅之皆宦官所惡也卜幹泣諫
曰陛下方側席求賢而一旦戮卿大夫七人皆國之忠
良無乃不可乎詔尚在臣所未敢宣露願陛下熟思之
因叩頭流血王沈叱幹曰卜侍中欲拒詔乎聰免幹為
庶人太宰河間王易等皆詣闕表諫曰王沈等矯弄詔
旨欺誣日月內諂陛下外佞相國威權之重侔于人主

多樹姦黨毒流海內知休等忠臣為國盡節恐發其姦
狀故巧為誣陷陛下不察遽加極刑痛徹天地賢愚傷
懼請免沈等官付有司治罪聰問沈等于相國粲粲盛
稱沈等忠清聰悅封沈等為列侯太宰易又詣闕上疏
極諫聰大怒手壞其疏易忿恚而卒易素忠直陳元達
倚之為援得盡諫爭及卒元達哭之慟曰人之云亡邦
國殄悴吾既不復能言安用默默苟生乎歸而自殺

前趙游子遠在幽囚不忘諫諍

東晉太興三年趙將解虎及長水校尉尹車謀反與巴
酋句徐庫彭等相結事覺虎車皆伏誅趙主曜囚徐彭
等五十餘人于阿房將殺之光祿大夫游子遠諫曰聖
王用刑惟誅元惡而已不宜多殺爭之叩頭流血曜怒
以為助逆而囚之盡殺徐彭等尸諸市十日乃投于水
于是巴衆盡反推巴酋句渠知為主自稱大秦改元曰
平趙四山氐羌巴羯應之者三十餘萬關中大亂城門
盡閉子遠又從獄中上表諫爭曜手毀其表曰大荔奴

不憂命在須臾猶敢如此嫌死晚邪叱左右速殺之中
山王雅郭汜朱紀呼延晏等諫曰子遠幽囚禍在不測
猶不忘諫爭忠之至也陛下縱不能用奈何殺之若子
遠朝誅臣等亦當夕死以彰陛下之過天下將皆捨陛
下而去陛下誰與居乎曜意解乃赦之

符秦王洛諫畋獵

咸安元年秦王堅如鄴獵于西山旬餘忘返伶人王洛
叩馬諫曰陛下羣生所繫今久獵不歸一旦患生不虞

奈太后天下何堅為之罷獵還宮王猛因進言曰畋獵誠非急務王洛之言不可忘也堅賜洛帛百匹拜官箴左右自是不復獵

宋扶令育上表被誅

元嘉十八年彭城王義康至豫章辭刺史以義康都督江交廣三州諸軍事前龍驤參軍巴東扶令育詣闕上表稱昔素盜諫漢文帝曰淮南王若道路遇霜露死陛下有殺弟之名文帝不用追悔無及彭城王義康先朝

之愛子陛下之次第若有迷謬之愆正可數之以善惡
導之以義方奈何信疑似之嫌一旦黜削遠送南垂草
萊黔首皆為陛下痛之廬陵往事足為龜鑑恐義康年
窮命盡奄忽于南臣雖微賤竊為陛下羞之陛下徒知
惡枝之宜伐豈知伐枝之傷樹伏願亟召義康返于京
甸兄弟協和君臣輯睦則四海之望塞多言之路絕矣
何必司徒公楊州牧然後可以置彭城王哉若臣所言
于國為非請伏重誅以謝陛下表奏即收付建康獄賜

死裴子野論曰夫在上為善若雲行雨施萬物受其
賜及其惡也若天裂地震萬物所驚駭其誰弗知其誰
弗見豈戮一人之身鉗一夫之口所能攘逃所能弭滅
哉是皆不勝其忿怒而有增于疾疹也以太祖之含弘
尚掩耳于彭城之戮自斯以後誰易由言有宋累葉罕
聞直諒豈骨鯁之氣俗愧前古抑時王刑政使之然乎
張約隕于權臣扶育斃于哲后宋之鼎鑊吁可畏哉

北魏古弼以奏事不聽擊劉樹

二十一年魏太子始總百揆命侍中中書監穆壽司徒
崔浩侍中張黎古弼輔太子決庶政古弼為人忠慎質
直嘗以上谷苑囿太廣乞減大半以賜貧民入見魏世
祖欲奏其事世祖方與給事中劉樹圍碁志不在弼弼
侍坐良久不獲陳聞忽起捽樹頭掣下牀搏其耳毆其
背曰朝廷不治實爾之罪世祖失容捨碁曰不聽奏事
朕之過也樹何罪置之弼具以狀聞世祖皆可其奏弼
曰為人臣無禮至此其罪大矣出詣公車免冠徒跣請

罪世祖召入謂曰吾聞築社之後蹇蹙而築之端冕而事之神降之福然則卿有何罪其冠履就職苟有可以利社稷便百姓者竭力為之勿顧慮也

高允皆面陳其事

大明二年魏中書侍郎高允好切諫朝廷事有不便允輒求見高宗常屏左右以待之或自朝至暮或連日不出羣臣莫知其所言語或痛切高宗所不忍聞命左右扶出然終善遇之時有上事為激訐者高宗省之謂羣

臣曰君父一也父有過子何不作書于衆中諫之而於私室屏處諫者豈非不欲其父之惡彰于外邪至於事君何獨不然君有得失不能面陳而上表顯諫欲以彰君之短明己之直此豈忠臣所為乎如高允者乃真忠臣也朕有過未嘗不面言至有朕所不堪聞者允皆無所避朕聞其過而天下不知可不謂忠乎允所與同徵者游雅等皆至大官封侯部下吏至刺史二千石者亦數十百人而允為郎二十七年不徙官高宗謂羣臣曰

金史卷九十一
卷九十一
汝等雖執弓刀在朕左右徒立耳未嘗有一言規正唯
伺朕喜悅之際祈官乞爵今皆無功而至王公允執筆
佐我國家數十年為益不少不過為郎汝等不自愧乎
乃拜允中書令

周朗以言事切直見殺

四年前廬陵內史周朗言事切直孝武帝銜之使有司
奏朗毋喪不如禮傳送寧州於道殺之朗之行也侍中
蔡興宗方在直請與朗別坐白衣領職

沈懷文數以直諫忤旨

六年初侍中沈懷文數以直諫忤旨孝武帝嘗出射雉
風雨至懷文與王彧江智淵約相與諫會召入雉場懷
文曰風雨如此非聖躬所宜冒彧曰懷文所啟宜從智
淵未及言孝武帝注弩作色曰卿欲效顏竣邪何以恒
知人事每孝武帝燕集在坐者皆令沈醉嘲謔無度懷
文素不飲酒又不好戲調武帝謂故欲異已謝莊嘗戒
懷文曰卿每與人異亦何可久懷文曰吾少來如此豈

可一朝而變非欲異物性所得耳孝武帝乃出懷文為
晉安王子勛征虜長史領廣陵太守懷文猶未發為有
司所糾免官禁錮十年懷文賣宅欲還東孝武帝聞之
大怒收付廷尉賜懷文死

明帝每優容虞愿

泰始七年明帝以故第為湘宮寺備極壯麗欲造十級
浮圖而不能乃分為二新安太守巢尚之罷郡入見明
帝謂曰卿至湘宮寺未此是我大功德用錢不少通直

散騎侍郎虞愿侍側曰此皆百姓賣兒貼婦錢所為佛
若有知當慈悲嗟愍罪高浮圖何功德之有侍坐者失
色明帝怒使人驅下殿愿徐去無異容明帝好圍碁碁
甚拙與第一品彭城丞王抗圍碁抗每假借之曰皇帝
飛碁臣抗不能斷明帝終不悟好之愈篤愿又曰堯以
此教丹朱非人主所宜好也明帝雖怒甚以愿王國舊
臣每優容之

北魏高祖道羣臣使諫

齊建武二年魏高祖謂羣臣曰國家從來有一事可歎
臣下莫肯公言得失是也夫人君患不能納諫人臣患
不能盡忠自今朕舉一人如有不可卿等直言其失若
有才能而朕所不識卿等亦當舉之如是得人者有賞
不言者有罪卿等當知之

范雲諫梁公納東昏余妃

梁天監元年梁公蕭衍納東昏余妃頗妨政事范雲以
為言梁公未之從雲與侍中領軍將軍王茂同入見雲

曰昔沛公入關婦女無所幸此范增所以畏其志大也
今明公始定建康海內想望風聲奈何襲亂亡之迹以
女德為累乎王茂起拜曰范雲言是也公必以天下為
念無宜留此梁公默然雲即請以余氏賚王茂梁公賢
其意而許之明日賜雲茂錢各百萬

江子四極言政治得失

大同二年尚書右丞考城江子四上封事極言政治得
失詔曰古人有言屋漏在上知之下朕有過失不能

自覺江子四等封事所言尚書可時加檢括於民有蠹
患者宜速詳啟

西魏置紙筆以求得失

五年魏置紙筆於陽武門外以求得失

北齊永安王浚以忠諫被囚

陳永定元年齊顯祖之為太原公也與永安王浚偕見
世宗顯祖有時洩出浚責顯祖左右曰何不為二兄拭
鼻顯祖心銜之及即位浚為青州刺史聰明矜恕吏民

悅之浚以顯祖嗜酒私謂近親曰二兄因酒敗德朝臣
無敢諫者大敵未滅吾甚以為憂欲乘驛至鄴面諫不
知用吾不或密以白顯祖顯祖益銜之浚入朝從幸東
山顯祖裸程為樂浚進諫曰此非人主所宜顯祖不悅
浚又于屏處召楊愔譏其不諫顯祖時不欲大臣與諸
王交通愔懼奏之顯祖大怒曰小人由來難忍遂罷酒
還宮浚尋還州又上書切諫詔徵浚浚懼禍謝疾不至
顯祖遣馳驛收浚老幼泣送者數千人至鄴與上黨王

渙皆盛以鐵籠置于北城地牢飲食溲穢共在一所

北周樂運陳宣帝八失

陳太建十一年周宣帝居喪纔踰年即肆聲樂魚龍百戲常陳殿前累日繼夜不知休息多聚美女以實後宮增置位號不可詳錄遊宴沈湎或旬日不出羣臣請事者皆因宦者奏之於是樂運輿櫬詣朝堂陳宣帝八失其一以為大尊比來事多獨斷不參諸宰輔與衆共之其二搜美女以實後宮儀同以上女不許輒嫁貴賤同

怨其三大尊一入後宮數日不出所須聞奏多附宦者
其四下詔寬刑未及半年更嚴前制其五高祖斷雕為
朴崩未踰年而遽窮奢麗其六徭賦下民以奉俳優角
抵其七上書字誤者即治其罪杜獻書之路其八玄象
垂誠不能詔諷善道修布德政若不革茲八事臣見周
廟不血食矣宣帝大怒將殺之朝臣恐懼莫有救者內
史中大夫元巖詣閤請見曰樂運不顧其死欲以求名
陛下不如勞而遣之以廣聖度宣帝頗感悟明日召運

謂曰朕昨夜思卿所奏實為忠臣賜御食而罷之

隋劉行本諫文帝答郎官

十三年隋文帝嘗怒一郎於殿前答之諫議大夫劉行本進曰此人素清其過又小願少寬之文帝不顧行本於是正當文帝前曰陛下不以臣不肖置臣左右臣言若是陛下安得不聽若非當致之於理豈得輕臣而不顧也因置笏於地而退文帝斂容謝之遂原所答者

隋煬帝性不喜人諫

大業九年煬帝從容謂祕書郎虞世南曰我性不喜人諫若位望通顯而諫以求名者彌所不耐至於卑賤之士雖少寬假然卒不置之地上汝其知之

蘇威言盜賊獲罪

十二年煬帝問侍臣盜賊左翊衛大將軍宇文述曰漸少煬帝曰比從來少幾何對曰不能什一納言蘇威引身隱柱煬帝呼前問之對曰臣非所司不委多少但患漸近煬帝曰何謂也威曰他日賊據長白山今近在汜

水且往日租賦丁役今皆何在豈非其人皆化為盜乎
此見奏賊皆不以實遂使失於支計不時剪除又昔在
鴈門許罷征遼今復徵發賊何由息煬帝不悅而罷尋
屬五月五日百僚多饋珍玩威獨獻尚書或諧之曰尚
書有五子之歌威意甚不遜煬帝益怒頃之煬帝問威
以伐高麗事威欲煬帝知天下多盜對曰今茲之役願
不發兵但赦羣盜自可得數十萬遣之東征彼喜於免
罪爭務立功高麗可滅煬帝不懌威出御史大夫裴蘊

奏曰此大不遜天下何處有多許賊煬帝曰老革多姦以賊脅我欲批其口且復隱忍蘊知帝意遣河南白衣張行本奏威昔在高陽典選濫授人官畏怯突厥請還京師煬帝令案驗獄成下詔數威罪狀除名為民後月餘復有奏威與突厥陰圖不軌者事下裴蘊推之蘊處威死威無以自明但摧謝而已煬帝憫而釋之曰未忍即殺遂并其子孫三世皆除名

煬帝殺諫臣

江都新作龍舟成送東都宇文述勸幸江都帝從之右
候衛大將軍趙才諫曰今百姓疲勞府藏空竭盜賊蜂
起禁令不行願陛下還京師安兆庶煬帝大怒以才屬
吏旬日意解乃出之朝臣皆不欲行煬帝意甚堅無敢
諫者建節尉任宗上書極諫即日于朝堂杖殺之煬帝
幸江都命越王侗等總留後事煬帝以詩留別宮人曰
我夢江都好征遼亦偶然奉信郎崔民象以盜賊充斥
於建國門上表諫煬帝大怒先解其頤然後斬之

唐孫伏伽上表諫高祖

武德元年萬年縣法曹孫伏伽上表以為隋以惡聞其過亡天下陛下龍飛晉陽遠近響應未期年而登帝位徒知得之之易不知隋失之之難也臣謂宜易其覆轍務盡下情凡人君言動不可不慎竊見陛下今日即位而明日有獻鷄鵠者此乃少年之事豈聖主所須哉又百戲散樂亡國淫聲近太常於民間借婦女裙襦五百餘襲以充妓衣擬五月五日玄武門遊戲此亦非所

以為子孫法也凡如此類悉宜廢罷善惡之習朝廷漸
染易以移人皇太子諸王參僚左右宜謹擇其人其有
門風不能雍睦為人素無行義專好奢靡以聲色遊獵
為事者皆不可使之親近也自古及今骨肉乖離以至
敗國亡家未有不因左右離間而然也願陛下慎之高
祖省表大悅下詔褒稱擢為治書侍御史賜帛三百匹
仍頒示遠近

高祖以李綱孫伏伽為第一

二年高祖考第羣臣以李綱孫伏伽為第一因置酒高
會謂裴寂等曰隋氏以主驕臣諂亡天下朕即位以來
每虛心求諫然唯李綱差盡忠款孫伏伽可謂誠直餘
人猶踵弊風俛首而已豈朕所望哉朕視卿如愛子卿
當視朕如慈父有懷必盡勿自隱也因命捨君臣之敬
極歡而罷

蘇世長似直而多詐

四年以蘇世長為諫議大夫嘗從校獵高陵大獲禽獸

高祖顧羣臣曰今日畋樂乎世長對曰陛下遊獵薄廢
萬機不滿十旬未足為樂高祖變色既而笑曰狂態復
發邪對曰於臣則狂於陛下甚忠嘗侍宴披香殿酒酣
謂高祖曰此殿煬帝之所為邪高祖曰卿諫似直而實
多詐豈不知此殿朕所為而謂之煬帝乎對曰臣實不
知但見其華侈如傾宮鹿臺非興王之所為故也若陛
下為之誠非所宜臣昔侍陛下於武功見所居宅僅庇
風雨當時亦以為足今因隋之宮室已極侈矣而又增

之將何以矯其失乎高祖深然之

張蘊古上大寶箴

九年前幽州記室直中書省張蘊古上大寶箴其略曰
聖人受命拯溺亨屯故以一人治天下不以天下奉一
人又曰壯九重于內所居不過容膝彼昏不知瑤其臺
而瓊其室羅八珍于前所食不過適口惟狂罔念丘其
糟而池其酒又曰勿沒沒而闇勿察察而明雖冕旒蔽
目而視于未形雖黻纁塞耳而聽于無聲太宗嘉之賜

以束帛除大理丞

裴矩諫太宗殺受賂之吏

太宗患吏多受賕密使左右試賂之有司門令史受絹一匹太宗欲殺之民部尚書裴矩諫曰為吏受賂罪誠當死但陛下使人遺之而受乃陷人于法也恐非所謂道之以德齊之以禮太宗悅召文武五品以上告之曰裴矩能當官力爭不為面從儻每事皆然何憂不治

太宗命諫官隨三品入閣

貞觀元年制自今中書門下及三品以上入閣議事皆命諫官隨之有失輒諫

太宗延見京宮問政事得失

太宗謂太子少師蕭瑀曰朕少好弓矢得良弓十數自謂無以加近以示弓工乃曰皆非良材朕問其故工曰木心不直則脉理皆邪弓雖勁而發矢不直朕始寤邇者辨之未精也朕以弓矢定四方識之猶未能盡況天下之務其能徧知乎乃命京官五品以上更宿中書內

省數延見問以民間疾苦及政事得失

太宗冀聞規諫

太宗神采英毅羣臣進見者皆失舉措太宗知之每見人奏事必假以辭色冀聞規諫嘗謂公卿曰人欲自見其形必資明鏡君欲自知其過必待忠臣苟其君愎諫自賢其臣阿諛順旨君既失國臣豈能獨全如虞世基等諂事煬帝以保富貴煬帝既弑世基等亦誅公輩宜用此為戒事有得失無惜盡言

孫伏伽諫太宗騎射

太宗好騎射孫伏伽諫以為天子居則九門行則警蹕
非欲苟自尊嚴乃為社稷生民之計也陛下好自走馬
射的以娛悅近臣此乃少年為諸王時所為非今天
子事業也既非所以安養聖躬又非所以儀刑後世臣
竊為陛下不取太宗悅未幾以伏伽為諫議大夫

太宗霽威納諫

二年魏徵容貌不逾中人而有膽略善回人主意每犯

顏苦諫或逢太宗怒甚徵神色不移太宗亦為之霽威
嘗謁告上冢還言于太宗曰人言陛下欲幸南山外皆
嚴裝已畢而竟不行何也太宗笑曰初實有此心畏卿
嗔故中輟耳太宗嘗得佳鷄自臂之望見徵來匿懷中
徵奏事固久不已鷄竟死懷中

太宗以納諫為難

太宗嘗閒居與王珪語有美人侍側太宗指示珪曰此
廬江王瑗之姬也瑗殺其夫而納之珪避席曰陛下以

廬江納之為是邪非邪太宗曰殺人而取其妻卿何問
是非對曰昔齊桓公知郭公之所以亡由善善而不能
用然棄其所言之人管仲以為無異於郭公今此美人
尚在左右臣以為聖心是之也太宗悅即出之還其親
族太宗使太常少卿祖孝孫教宮人音樂不稱旨太宗
責之溫彥博王珪諫曰孝孫雅士今乃使之教宮人又
從而譴之臣竊以為不可太宗怒曰朕寘卿等於腹心
當竭忠直以事我乃附下罔上為孝孫遊說邪彥博拜

謝珪不拜曰陛下責臣以忠直今臣所言豈私曲邪此乃陛下負臣非臣負陛下太宗默然而罷明日上謂房玄齡曰自古帝王納諫誠難朕昨責溫彥博王珪至今悔之公等勿為此不盡言也

太宗責執政亦受人諫

五年太宗謂執政曰朕常恐因喜怒妄行賞罰故欲公等極諫公等亦宜受人諫不可以己之所欲惡人違之苟自不能受諫安能諫人

長孫皇后賞魏徵直諫

六年長樂公主將出降太宗以公主皇后所生特愛之
敕有司資送倍于永嘉長公主魏徵諫曰昔漢明帝欲
封皇子曰我子豈得與先帝子比皆令半楚淮陽今資
送公主倍于長主得無異于明帝之意乎太宗然其言
入告皇后后歎曰妾亟聞陛下稱重魏徵不知其故今
觀其引禮義以抑人主之情乃知真社稷之臣也妾與
陛下結髮為夫婦曲承恩禮每言必先候顏色不敢輕

犯威嚴況以人臣之疎遠乃能抗言如是陛下不可不從也因請遣中使齎錢四百緡絹四百匹以賜徵且語之曰聞公正直乃今見之故宜相賞公宜常秉此心勿轉移也太宗嘗罷朝怒曰會須殺此田舍翁后問為誰太宗曰魏徵每廷辱我后退具朝服立于廷太宗驚問其故后曰妾聞主明臣直今魏徵直由陛下之明故也妾敢不賀太宗乃悅

魏徵不肯面從而復諫

太宗宴近臣於丹霄殿長孫无忌曰王珪魏徵昔為仇讎不謂今日得同此宴太宗曰徵珪盡心所事故我用之然徵每諫我不從我與之言輒不應何也魏徵對曰臣以事為不可故諫若陛下不從而臣應之則事遂施行故不敢應太宗曰且應而復諫庸何傷對曰昔舜戒羣臣爾無面從退有後言臣心知其非而口應陛下乃面從也豈稷契事舜之意邪太宗大笑曰人言魏徵舉止踈慢我視之更覺斌媚正為此耳徵起拜謝曰陛下

開臣使言故臣得盡其愚若陛下拒而不受臣何敢數犯顏色乎

魏徵請借辭色以來諫

七年太宗問魏徵曰羣臣上書可采及召對多失次何也對曰臣觀百司奏常事數日思之及至上前三分不能道一況諫者拂意觸忌非陛下借之辭色豈敢盡其情哉太宗由是接羣臣辭色愈溫嘗曰煬帝多猜忌臨朝對羣臣多不語朕則不然與羣臣相親如一體耳

魏徵諫治皇甫德參謗訕之罪

八年中年丞皇甫德參上言修洛陽宮勞人收地租厚
斂俗好高髻蓋宮中所化太宗怒謂房玄齡等曰德參
欲國家不役一人不收斗租宮人皆無髮乃可其意邪
欲治其謗訕之罪魏徵諫曰賈誼當漢文帝時上書云
可為痛哭者一可為流涕者二自古上書不激切不能
動人主之心所謂狂夫之言聖人擇焉唯陛下裁察太
宗曰朕罪斯人則誰復敢言乃賜絹二十匹佗日徵奏

言陛下近日不好直言雖勉強含容非曩時之豁如太宗乃更加優賜拜監察御史

太宗聽諫不逮貞觀之初

十二年以皇孫生宴五品以上于東宮太宗曰貞觀之前從朕經營天下玄齡之功也貞觀以來繩愆糾謬魏徵之功也皆賜之佩刀太宗謂徵曰朕政事何如往年對曰威德所加比貞觀之初則遠矣人悅服則不逮也太宗曰今所為猶往年也何以異對曰陛下貞觀之初

恐人不諫常導之使言中間悅而從之今則不然雖勉從之猶有難色所以異也太宗曰其事可聞歟對曰陛下昔欲殺元律師孫伏伽以為法不當死陛下賜以蘭陵公主園直百萬或云賞太厚陛下云朕即位以來未有諫者故賞之此導之使言也司戶柳雄妄訴隋資陛下欲誅之納戴胄之諫而止是悅而從之也近皇甫德參上書諫修洛陽宮陛下恚之雖以臣言而罷勉從之也太宗曰非公不能及此人苦不自知耳

魏徵勸太宗虛心采納

十五年太宗問魏徵比來朝臣何殊不論事對曰陛下虛心采納必有言者凡臣徇國者寡愛身者多彼畏罪故不言耳太宗曰然人臣闕說忤旨動及刑誅與夫蹈湯火冒白刃者亦何異哉是以禹拜昌言良為此也

太宗令魏徵封狀以進

十六年特進魏徵有疾太宗手詔問之且言不見數日朕過多矣今欲自往恐益為勞若有聞見可封狀進來

徵上言比者弟子陵師奴婢忽主下多輕上皆有為而然漸不可長又言陛下臨朝常以至公為言退而行之未免私僻或畏人知橫加威怒欲盖彌彰竟有何益

褚遂良謂忠臣愛君諫其漸

十七年太宗問諫議大夫褚遂良曰舜造漆器諫者十餘人此何足諫對曰奢侈者危亡之本漆器不已將以金玉為之忠臣愛君必防其漸若禍亂已成無所復諫矣太宗曰然朕有過卿亦當諫其漸朕見前世帝王拒

諫者多云業已為之或云業已許之終不為改如此欲無危亡得乎

太宗欲自聞其失

十八年太宗幸太平宮謂侍臣曰人臣順旨者多犯顏則少今朕欲自聞其失諸公其直言無隱長孫無忌等皆曰陛下無失劉洎曰頃有上書不稱旨者陛下皆面加窮詰無不慙懼而退恐非所以廣言路馬周曰陛下比來賞罰微以喜怒有所高下此外不見其失上皆納

之太宗好文學而辯敏羣臣言事者上引古今以折之多不能對劉洎上書諫曰帝王之與凡庶聖哲之與庸愚上下相懸擬倫斯絕是知以至愚而對至聖以極卑而對至尊徒思自彊不可得也陛下降恩旨假慈顏凝旒以聽其言虛襟以納其說猶恐羣下未敢對敷況動神機縱天辯飾詞以折其理引古以排其議欲令凡庶何階應答且多記則損心多語則損氣心氣內損形神外勞初雖不覺後必為累須為社稷自愛豈為性好自

傷乎至如秦政彊辯失人心于自矜魏文宏才虧衆望于虛說此才辯之累較然可知矣太宗飛白答之曰非慮無以臨下非言無以述慮比有談論遂致煩多輕物驕人恐由茲道形神心氣非此為勞今聞謹言虛懷以改

高宗謂蕭鈞真諫議

永徽二年左武侯引駕盧文操踰垣盜左藏物高宗以引駕職在糾繩乃自為盜命誅之諫議大夫蕭鈞諫曰

文操情實難原然法不至死高宗乃免文操死顧侍臣
曰此真諫議也

高宗求諫竟無諫者

麟德二年高宗語及隋煬帝謂羣臣曰煬帝拒諫而亡
朕常以為戒虛心求諫而竟無諫者何也李勣對曰陛
下所為盡善羣臣無得而諫

李善感進諫天下謂鳳鳴朝陽

永淳元年高宗既封泰山欲遍封五嶽作奉天宮于嵩

山南監察御史襄行李善感諫曰陛下封泰山告太平致羣瑞與三皇五帝比隆矣數年以來菽粟不稔餓殍相望四夷交侵兵車歲駕陛下宜恭默思道以穰災譴乃更廣營宮殿勞役不休天下莫不失望臣忝備國家耳目竊以此為憂高宗雖不納亦優容之自褚遂良韓瑗之死中外以言為諱無敢逆意直諫幾二十年及善感始諫天下皆喜謂之鳳鳴朝陽

陳子昂

永昌元年右衛曹參軍陳子昂上疏以為周頌成康
漢稱文景皆以能措刑故也今陛下之政雖盡善矣然
太平之朝上下樂化不宜有亂臣賊子日犯天誅比者
大獄增多逆徒滋廣愚臣頑昧初謂皆實乃去月十五
日陛下特察繫囚李珍等無罪百僚慶悅皆賀聖明臣
乃知亦有無罪之人挂于疎網者陛下務在寬典獄官
務在急刑以傷陛下之仁以誣太平之政臣竊恨之又
九月二十一日敕免楚金等死初有風雨變為景雲臣

聞陰慘者刑也陽舒者德也聖人法天天亦助聖天意如此陛下豈可不承順之哉

李景伯真諫官

景龍三年中宗數與近臣學士宴集令各效伎藝以為樂工部尚書張錫舞談容娘將作大匠宗晉卿舞渾脫左衛將軍張洽舞黃顰左金吾將軍杜元談誦婆羅門呪中書舍人盧藏用效道士上章國子司業河東郭山惲獨曰臣無所解請歌古詩中宗許之山惲乃歌鹿鳴

蟋蟀明日中宗賜山憚救嘉美其意賜時服一襲中宗
又嘗宴侍臣使各為迴波辭衆皆為諂語或自求榮祿
諫議大夫李景伯曰迴波爾時酒卮徵臣職在箴規侍
宴既過三爵諠譁竊恐非儀中宗不悅蕭至忠曰此真
諫官也

李林甫指立仗馬以杜諫言

開元二十四年李林甫欲蔽塞人主視聽自專大權明
召諸諫官謂曰今明主在上羣臣將順之不暇烏用多

言諸君不見立仗馬乎食三品料一鳴輒斥去懷之何及補闕杜璡嘗上書言事明日黜為下邳令自是諫爭路絕矣

肅宗開諫諍之塗

至德元載初李林甫為相諫官言事皆先白宰相退則又以所言白之御史言事須大夫同署至是敕盡革其弊開諫諍之塗又令宰相分直政事筆承旨旬日而更懲林甫及楊國忠之專權故也

陸贄書勸德宗接下從諫

建中四年德宗問陸贄以當今切務贄以邇日致亂由
上下之情不通勸上接下從諫乃上疏其略曰為下者
莫不願忠為上者莫不求理然而下每苦上之不理上
每苦下之不忠若是者何兩情不通故也下之情莫不
願達於上上之情莫不求知於下然而下恒苦上之難
達上恒苦下之難知若是者何九弊不去故也所謂九
弊者上有其六而下有其三好勝人恥聞過騁辯給眩

聰明厲威嚴恣彊愎此六者君上之弊也諂諛顧望畏
愼此三者臣下之弊也上好勝必甘於佞辭上恥過必
忌於直諫如是則下之諂諛者順旨而忠實之語不聞
矣上騁辯必勸說而折人以言上眩明必臆度而虞人
以詐如是則下之顧望者自便而切磨之辭不盡矣上
厲威必不能降情以接物上恣愎必不能引咎以受規
如是則下之畏愼者避辜而情理之說不申矣夫以區
域之廣大生靈之衆多宮闕之重深高卑之限隔自黎

獻而上獲覩至尊之光景者踰億兆而無一焉就獲覩
之中得接言議者又千萬不一幸而得接者猶有九弊
居其間則上下之情所通鮮矣上情不通於下則人惑
下情不通於上則君疑疑則不納其誠惑則不從其令
誠而不見納則應之以悖令而不見從則加之以刑下
悖上刑不敗何待是使亂多理少從古以然又曰昔趙
武啗啗而為晉賢臣絳侯木訥而為漢元輔然則口給
者事或非信辭屈者理或未窮人之難知堯舜所病胡

可以一訓一詁而謂盡其能哉以此察天下之情固多
失實以此輕天下之士必有遺才又曰諫者多表我之
能好諫者直示我之能賢諫者之狂誣明我之能恕諫
者之漏泄彰我之能從有一于斯皆為盛德是則人君
之與諫者交相益之道也諫者有爵賞之利君亦有理
安之利諫者得獻替之名君亦得采納之名然猶諫者
有失中而君無不美唯恐謹言之不切天下之不聞如
此則納諫之德光矣德宗頗采用其言

陸贄數直諫忤上意

興元元年陸贄在翰林為德宗所親信居艱難中雖有宰相大小之事德宗必與贄謀之故當時謂之內相德宗行止必與之俱梁洋道險嘗與贄相失經夕不至德宗驚憂涕泣募得贄者賞千金久之乃至德宗喜甚太子以下皆賀然贄數直諫迂上意盧杞雖貶官德宗心庇之贄極言杞姦邪致亂德宗雖貌從心頗不悅故劉從一姜公輔皆自下陳登用贄恩遇雖隆未得為相

陽城辨陸贄裴延齡忠佞

貞元十一年陸贄既罷相裴延齡因譖李充張滂李銑
黨於贄貶贄為忠州別駕充等為長史初陽城自處士
徵為諫議大夫拜官不辭未至京師人皆想望風采曰
城必諫諍死職下及至諸諫官紛紛言事細碎天子益
厭苦之而城方與二弟及客日夜痛飲人莫能窺其際
皆以為虛得名耳前進士河南韓愈作諍臣論以譏之
城亦不以屑意及陸贄等坐貶德宗怒未解中外惴恐

以為罪且不測無敢救者城聞而起曰不可令天子信
用姦臣殺無罪人即帥拾遺王仲舒歸登右補闕熊執
易崔邠等守延英門上疏論延齡姦佞贊等無罪德宗
大怒欲加城等罪太子為之營救德宗意乃解令宰相
諭遣之於是金吾將軍張萬福聞諫官伏閣諫趨往至
延英門大言賀曰朝廷有直臣天下必太平矣遂遍拜
城與仲舒等已而連呼太平萬歲太平萬歲萬福武人
年八十餘自此名重天下時朝夕相延齡陽城曰脫以

延齡為相城當取白麻壞之慟哭于廷有李繁者泌之子也城盡疏延齡過惡欲密論之以繁故人子使之繕寫繁徑以告延齡延齡先詣上一一自解疏入德宗以為妄不之省

元稹上疏論諫職

元和元年以元稹為右拾遺稹上疏論諫職以為昔太宗以王珪魏徵為諫官宴遊寢食未嘗不在左右又命三品以上入議大政必遣諫官一人隨之以參得失故

天下大理今之諫官大不得豫名見次不得參時政排
行就列朝謁而已近年以來正牙不奏事庶官罷巡對
諫官能舉職者獨誥命有不便則上封事耳君臣之際
諷喻于未形籌畫於至密尚不能回至尊之盛意況于
既行之誥令已命之除授而欲以咫尺之書收絲綸之
詔誠亦難矣願陛下時于延英召對使盡所懷豈可寘
於其位而屏棄疎賤之哉頃之復上疏以為理亂之始
必有萌象開直言廣視聽理之萌也甘諂諛蔽近習亂

之象也自古人主即位之初必有敢言之士人主苟受而賞之則君子樂行其道競為忠讜小人亦貪得其利不為回邪矣如是則上下之志通幽遠之情達欲無理得乎苟拒而罪之則君子卷懷括囊以保其身小人阿意迎合以竊其位矣如是則十步之事皆可欺也欲無亂得乎昔太宗初即政孫伏伽以小事諫太宗喜厚賞之故當是時言事者惟患不深切未嘗以觸忌諱為憂也太宗豈好逆意而惡從欲哉誠以順適之快小而危

亡之禍大故也陛下踐阼今已周歲未聞有受伏加之
賞者臣等備位諫列曠日彌年不得召見每就列位屏
氣鞠躬不敢仰視又安暇議得失獻可否哉供奉官尚
爾況疎遠之臣乎此蓋羣下因循之罪也因條奏請次
對百官復正牙奏事禁非時貢獻等十事憲宗頗嘉納
其言時召見之

李絳諫憲宗欲罪諫官

二年憲宗又嘗從容問李絳曰諫官多謗訕朝政皆無

事實朕欲謫其尤者一二人以儆其餘何如對曰此殆非陛下之意必有邪臣欲壅蔽陛下之聰明也人臣死生繫人主喜怒敢發口諫者有幾就有諫者皆晝度夜思朝刪暮減比得上達什無二三故人主孜孜求諫猶懼不至况罪之乎如此杜天下之口非社稷之福也憲宗善其言而止

憲宗戒宰相當十論

憲宗謂宰相曰太宗以神聖之資羣臣進諫者猶往復

數四况朕寡昧自今事有違宜卿當十論無但一二而已

憲宗度李絳必諫且罷獵

五年憲宗嘗欲近獵苑中至蓬萊池西謂左右曰李絳必諫不如且止

憲宗謂李絳真忠臣

翰林學士李絳面陳吐突承璀專橫語極懇切憲宗作色曰卿言大過絳泣曰陛下置臣于腹心耳目之地若

臣畏避左右愛身不言是臣負陛下言之而陛下惡聞
乃陛下負臣也憲宗怒解曰卿所言皆人所不能言使
朕聞所不聞真忠臣也它日盡言皆應如是

武儒衡言皇甫鏐

十四年裴度在相位知無不言皇甫鏐之黨陰擠之詔
度充河東節度使皇甫鏐專以掎克取媚人無敢言者
獨諫議大夫武儒衡上疏言之鏐自訴于憲宗憲宗曰
卿以儒衡上疏將報怨邪鏐乃不敢言

柳公權以筆諫

十五年穆宗見夏州觀察判官柳公權書跡愛之以公權為右拾遺翰林侍書學士穆宗問公權卿書何能如是之善對曰用筆在心心正則筆正穆宗默然改容知其以筆諫也

穆宗訝諫官入閣論事

羣臣入閣退諫議大夫鄭覃崔郾等五人進言陛下宴樂過多畋遊無度今胡寇壓境忽有急奏不知乘輿所

在又晨夕與近習倡優狎昵賜與過厚夫金帛皆百姓膏血非有功不可與雖內藏有餘願陛下愛之萬一四方有事不復使有司重斂百姓時久無閤中論事者穆宗始甚訝之謂宰相曰此輩何人對曰諫官穆宗乃使人慰勞之曰當依卿言宰相皆賀然實不能用也

韋處厚諫敬宗遊宴

長慶四年翰林學士韋處厚諫敬宗宴遊曰先帝以酒色致疾損壽臣是時不死諫者以陛下年已十五故也

今皇子纔一歲臣安敢畏死而不諫乎敬宗感其言賜錦綵百匹銀器四

獨孤朗等論王播姦邪

王播以錢十萬緡賂王守澄求復領利權諫議大夫獨孤朗張仲方起居郎柳公權起居舍人宋申錫拾遺李景讓薛廷老等請開延英論其姦邪敬宗問前廷爭者不在中邪即日除劉栖楚諫議大夫

張權輿諫敬宗幸驪山

寶歷元年敬宗欲幸驪山溫湯左僕射李絳諫議大夫張仲方等屢諫不聽拾遺張權輿伏紫宸殿下叩頭諫曰昔周幽王幸驪山為犬戎所殺秦始皇葬驪山國亡玄宗宮驪山而祿山亂先帝幸驪山而享年不長敬宗曰驪山若此之凶邪我宜一往以驗彼言遂幸溫湯即日還宮謂左右曰彼叩頭者之言安足信哉

魏謩以盡言不忝厥祖

開成元年李孝本二女配沒石軍文宗取之入宮右拾

遺魏謩上疏以為陛下不邇聲色屢出宮女以配鰥夫
竊聞數月以來教坊選試以百數莊宅收市猶未已又
召李孝本女入宮不避宗姓大興物論臣竊惜之昔漢
光武一顧列女屏風宋弘猶正色抗言光武即撤之陛
下豈可不思宋弘之言欲居光武之下乎文宗即出孝
本女擢謩為補闕曰朕選市女子以賜諸王耳憐孝本
女宗枝髡鬣孤露故收養宮中謩於疑似之間皆能盡
言可謂愛我不忝厥祖矣命中書優為制辭以賞之謩

徵之五世孫也

柳公權有諍臣風采

二年文宗對中書舍人柳公權等於便殿文宗舉衫袖示之曰此衣已三澣矣衆皆美文宗之儉德公權獨無言文宗問其故對曰陛下貴為天子富有四海當進賢退不肖納諫諍明賞罰乃可以致雍熙服澣濯之衣乃末節耳文宗曰朕知舍人不應復為諫議以卿有諍臣風采須屈卿為之以公權為諫議大夫

柳公權諫納郭敗二女

三年文宗問翰林學士柳公權以外議對曰郭敗除邠寧外間頗以為疑文宗曰敗尚父之姪太后叔父在宮無過自金吾作小鎮外間何尤焉對曰非謂敗不應為節度使也聞陛下近取敗二女入宮有之乎文宗曰然入參太皇太后耳公權曰外間不知皆云敗納女後宮故得方鎮文宗俛首良久曰然則奈何對曰獨有自南內遣歸其家則外議自息矣是日太皇太后遣中使送

二女還敗家

高少逸等諫武宗校獵

會昌二年武宗幸涇陽校獵諫議大夫高少逸鄭朗於閣中諫曰陛下北來遊獵稍頻出城太遠侵星夜歸萬機曠廢武宗改容謝之

宣宗謂諫官要在舉職

大中八年中書門下奏拾遺補闕缺負請更增補宣宗曰諫官要在舉職不必人多如張道符牛叢趙璘輩數

人使朕日聞所不聞足矣久之叢自司勲負外郎出為睦州刺史入謝宣宗賜之紫叢既謝前言曰臣所服緋刺史所借也宣宗遽曰且賜緋上重惜服章有司常具緋紫衣數襲從行以備賞賜或半歲不用其一故當時以緋紫為榮

宣宗樂聞規諫

十一年宣宗欲幸華清宮諫官論之甚切宣宗為之止宣宗樂聞規諫凡諫官論事門下封駁苟合於理多屈

意從之得大臣章疏必焚香盥手而讀之

懿宗不從諫言改敕命

咸通四年敕以閤門使吳德應等為館驛使臺諫上言
故事御史巡驛不應忽以內臣代之懿宗諭以敕命已
行不可復改左拾遺劉蛻上言昔楚子縣陳得申叔一
言而復封之太宗發卒修乾元殿聞張玄素諫即日罷
之自古明君所尚者從諫如流豈有已行而不改且敕
自陛下出之自陛下改之何為不可弗聽

侯昌業以上疏極諫被誅

廣明元年左拾遺侯昌業以盜賊滿關東而僖宗不親政事專務游戲賞賜無度田令攷專權無上天文變異社稷將危上疏極諫僖宗大怒召昌業至內侍省賜死

張道古上疏得貶

乾寧四年右拾遺張道古上疏稱國家有五危二亂昔漢文帝即位未幾明習國家事今陛下登極已十年而曾不知為君馭臣之道太宗內安中原外開四夷海表

之國莫不入臣今先朝封域日蹙幾盡臣雖微賤竊傷
陛下朝廷社稷始為姦臣所弄終為賊臣所有也昭宗
怒貶道古施州司戶仍下詔罪狀道古宣示諫官

後唐趙遠諫秦王從榮

長興四年初秦王從榮失道六軍判官司諫郎中趙遠
諫曰大王地居上嗣當勤修令德奈何所為如是勿謂
父子至親為可恃獨不見恭世子戾太子乎從榮怒出
為涇州判官及從榮敗遠以是知名

閩葉翹因諫女寵被黜責

清泰二年閩主昶以永泰葉翹為內宣徽使參政事翹博學質直閩惠宗擢為福王友昶以師傅禮待之多所裨益宮中謂之國翁昶既嗣位驕縱不與翹議國事一旦昶方視事翹衣道士服過廷中趨出昶召還拜之曰軍國事殷久不接對孤之過也翹頓首曰老臣輔導無狀致陛下即位以來無一善可稱願乞骸骨昶曰先帝以孤屬公政令不善公當極言奈何棄孤去厚賜金帛

慰諭令復位昶元妃良國夫人李氏同平章事敏之女昶嬖李春鶯待夫人甚薄翹諫曰夫人先帝之甥聘之以禮奈何以新愛而棄之昶不悅由是疎之未幾復上書言事昶批其紙尾曰一葉隨風落御溝遂放歸永泰以壽終

後晉薛融諫修洛陽宮

天福三年河南留守高行周奏修洛陽宮左諫議大夫薛融諫曰今宮室雖經焚毀猶侈于帝堯之茅茨所費

雖寡猶多於漢文之露臺况魏城未下公私困窘誠非
陛下修宮館之日請俟海內平寧營之未晚高祖納其
言仍賜詔褒之

閩黃諷不肯以直諫被杖

閩諫議大夫黃諷以閩主淫暴與妻子辭訣入諫閩主
欲杖之諷曰臣若迷國不忠死亦無怨直諫被杖臣不
受也閩主怒黜為民

陳光遠以死諫閩主

八年初閩主曦侍康宗宴會新羅獻寶劍康宗舉以示
同平章事王俛曰此何所施俛對曰斬為臣不忠者時
曦已蓄異志凜然變色至是宴羣臣復有獻劍者曦命
發俛冢斬其屍校書郎陳光逸謂其友曰主上失德亡
無日矣吾欲死諫其友止之不從上書陳曦大惡五十
事曦怒命衛士鞭之數百不死以繩繫其頸懸諸庭樹
久之乃絕

南康蕭儼以諫諍得罪

開運元年唐主決欲傳位於齊燕二王翰林學士馮延巳等因之欲隔絕中外以擅權敕齊王景遂參決庶政百官惟樞密副使魏岑查文徽得白事餘非召對不得見國人大駭給事中蕭儼上疏極論不報侍衛都虞候賈崇叩閣求見曰臣事先帝三十年觀其延接疎遠孜孜不急下情猶有不通者陛下新即位所任者何人而頓與羣臣謝絕臣老矣不復得奉顏色因涕泗嗚咽唐主感悟遽收前敕唐主於宮中作高樓召侍臣觀之衆

皆歎美蕭儼曰恨樓下無井唐主問其故對曰以此不及景陽樓耳唐主恕貶于舒州觀察使孫晟遣兵防之儼曰儼以諫爭得罪非有它志昔顧命之際君幾危社稷其罪顧不重于儼乎今日反見防邪晟慙懼遽罷之後周世宗詔羣臣極言得失

顯德二年詔羣臣極言得失其略曰朕于卿大夫才不能盡知面不能盡識若不采其言而觀其行審其意而察其忠則何以見器略之淺深知任用之當否若言之

不入罪實在予苟求之不言咎將誰執


蜀主貶章九齡毀斥大臣

五年蜀右補闕章九齡見蜀主言政事不治由姦佞在朝蜀主問姦佞為誰指李昊王昭遠以對蜀主怒以九齡為毀斥大臣貶維州錄事參軍

李起不能慎默

六年蜀主以李昊領武信節度使右補闕李起上言故事宰相無領方鎮者蜀主曰昊家多冗費以厚祿優之

耳起性倖直李昊嘗語之曰以子之才苟能慎默當為翰林學士起曰俟無舌乃不言耳



通鑑總類卷九上